

Date – 03/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Larsap Dr. Hari Babu Kambhampati an Mizorama hmasawna ruhrel siam nan leh hmasawna hrang hrang atan CSR Fund hman tangkai a pawimawh a ti.
2. MYC Chairman Pu Malsawmzuala Ralte chuan, ZPM in sawrkarna a siam atanga hun reilote chhungin thalai thahnem takin MYC kaltlangin hna an hmuh tawh a ti.
3. Sawrkar leh Opposition Party te chuan Parliament session kal mumal thei lo tihtawp an remti.
4. External Affairs Minister Dr. S. Jaishankar chuan khawvelin kil tin atangin harsatna a tawh avangin thawhhona tha neih a pawimawh a ti.

<><><>

GOVERNOR

Larsap Dr. Hari Babu Kambhampati an Mizorama hmasawna ruhrel siam nan leh hmasawna hrang hrang atan CSR Fund hman tangkai a pawimawh thu a sawi.

Nimina Health & Family Welfare Minister Pi Lalrinpuui, Adviser to CM (Finance & Planning) Pu TBC Lalvenchhunga, ZMC Director Dr. John Zohmingthanga leh Dr. Haroon M. Pillay, Neurosurgeon, Silverline Hospital, Kochi-te Raj Bhavan-a a kawmna ah he thu hi sawiin Larsap chuan CSR Fund hman tangkai a nih theih nan Public Sector Undertaking (PSU) hrang hrangah rawnate thlen zung zung a tul thu a sawi a, Prime Minister-in PSU te chu NE State tan an CSR fund-te hmang uar tura a chah thu sawiin, hei hi remchangah hmanga fund hai chhuah dan kawng ngaihven nasat lehzual a tul hle a ni a ti bawk.

Thutkhawm ah hian Zoram Medical College (ZMC) a Neurosurgery Department din a nih theih dan tur chungchang sawiho a ni a, Health Minister Pi Lalrinpuui chuan hriselna kawnga hmasawna tura theihtawp chhuah mek zel a nih thu sawiin, ZMC-ah Neurosurgery Department awm theih nana hmalak mek bakah Cardiothoraco Vascular Surgery OT Unit, IVF Centre leh tul dangte a awm thei nana tanlak chhunzawm zel a pawimawh thu a sawi a. Health infrastructure tihchangtlun a nih theih nana Governor hmalakna leh thahnemngaihna chu fakawm a tih thu a sawi bawk.

He hunah hian Mizoram mipuite mamawh em em Neurosurgery Department ZMC-a hawn a nih theih nana hmalak tul hrang hrangte sawi ho a ni a. Hmunhma thuhlaah harsatna a awm loh thu tarlan niin, hemi atana sum mamawh zat tur leh detailed project proposal siamte thlirhoa pawm a ni a. Hemi tur hian Indian Oil Corporation Ltd. te inhuam angin CSR fund dil ni se, a ranglamin detailed project proposal thawna ngaihven zui ni se tih a ni.



AMC

Aizawl Municipal Corporation (AMC) Corporator ten sorkar kum kal mekah fund chanve an la dawnglo.

Akashvani Correspondent zawnha chhangin Finance Accounts Officer (FAO) Pu HT Lalropuia chuan kum 2024-2025 sawrkar kuma budget siam lain ward 19 a corporator ten ward fund cheng nuai 35 theuh dawng thei tura ruahhman a nih thu sawiin ULB grants 2023-24 ah first leh second installment ah cheng nuai 5 ve ve dah a ni a, ULB grants 2024-25 ah cheng nuai 10 dah a ni bawk a. Property tax khawn mek atangin cheng nuai 15 theuh dawng thei tura ruahhman a nih thu a sawi bawk.

Pu HT Lalropuia chuan kum 2023-24 first installment chiah dawn ala nih thu sawiin kumin chhunga budget dah angin an kal theiloh thu a sawi.



ZPM

Mizoram Youth Commission Chairman Pu Malsawmzuala Ralte chuan, ZPM in sawrkarna a siam atanga hun reilote chhungin thalai thahnem takin MYC hmalakna kaltlangin hna an hmuh tawh thu a sawi.

Nimina Aizawla ZPM Office ah thusawiin Pu Malsawmzuala Ralte chuan, MYC office Aizawl ah, thalai hna zawng mekte tan group A leh B coaching class, zing, chhun leh tlaiah te kalpui mek a ni tih a sawi a. Zirlai 280 vel an awm a, ASI exam turte pualin mock exam an buatsaih bawk tih sawiin Aizawl bakah hian Lunglei, Siaha, Champhai leh Kolasibah te coaching class kalpui mek a ni a, coaching class atan hian fee an ti flawm a, sorkar hna zawng mek thalaite pawhin an bawh ve hle a ti a, kum tharah a remchan angin, Serchhip leh Mamit ah Youth Centre din theih an inbeisei bawk a ni, a ti.

Pu Malsawmzuala chuan Mizoram University incubation centre-te nen thawk hovin December thla chhungin Enterpreneurship Development Centre MYC office-ah din turin hma an la chho mek tih a sawi a, livelihood business incubator buatsaih an rel a, India leh Taiwan-in hnathawk tur lak luh kawngah inremna an siam bawhzuiin tunah hian mizo nula 2 ten August thla atang khan Taiwan-ah Chinese tawng zirin an awm mek a ni, a ti.



NATIONAL POLLUTION CONTROL DAY

National Pollution Control Day pualin nimin khan Mizoram Pollution Control Board (MPCB) chuan district hrang hrangah faina lam hawi inzirtirna hun a hmang a.

Pollution Control Day pual hian Mizoram district hrang hrangah a rualin District Education Office (DEO) leh MPCB kaihhruainain School Eco-Club naupangte nen a huhoa kawngpui leh lui dung then fai hnatlâng rûnpui neih a ni a, mi 5000 chuang an thawkchhuak a ni. Aizawl-ah chuan MPCB staff-te leh sikul thlanchhuah bika Eco Club memberte chuan Tuikual lui, Lawibual lui leh Chite luia hmankhat daih sarâng lam bawlhhlawhte chharin an hnatlâng a, hêng an bawlhhlawh chhar khâwmte hi Tuiriala bawlhhlawh paihna hmunah paih fel nghal a ni.

Kumin National Pollution Control Day pual hian MPCB chuan ‘Clean Air, Green Earth’ tih thupui hmangin Photography Competition leh Online Poster Making Competition buatsaih mek a ni a. Boruak thianglim pawimawhia inzirtir leh inhrilh hriat nân Public campaign November ni 30 khân Mizoram University Eco-Club member-te nen hlawhtling taka buatsaih a ni bawk.

MPCB Chairman Pu Liankima Lailung chuan thangthar lo la awm zêl turte tâna chênna tlâk khawvêl kan hnutchhiah theih nan tuna chêng mêkten uluk taka kan enkawl a tûl thu a sawi.

National Pollution Control Day hi kum tin December ni 2-ah hman thin a ni a, he ni hi kum 1984-a Bhopal Gas Tragedy-a nun chân tâ-te hriat reng nâna tih niin mipuite hnêna pollution chungchâng inzirtir nân leh environment humhima tibawlhhlawh lo zâwnga khawsa tura infuih thar nân hman thin a ni.



RD MINISTER

Rural Development Minister Prof. Lalnilawma chuan Khawbung RD Block-in ‘Project Rotling - Hmasawna Rahbi Thar’ hnuaia an hnathawh - ‘Project Sustainable Livelihood through Ericulture at Chhingzawl Ram’ chu a tlawh a. Minister hian Tuipuiral Games 2025 neihna tur Samthang Playground laih zauh dan tur pawh a en nghal a ni.

‘Project Sustainable Livelihood through Ericulture at Chhingzawl Ram’ ah hian Rural Development leh Sericulture Department-te thawhdunna a ni a. He project hnuaiah hian Chawngfianga tui, Mu bu ram ami chu lak a ni a. Tui dahkhawlana atan hian tuizem lian pakhat siam niin, a thlang lamah ruah tui khawlana tur leh tuizem lian aṅanga tui sem thlakna tur tuizem panga siam a ni. Tui hi Chhingzawl rama muṅih, pangbal leh thlai dang te chawm nan a hman tur a ni a, heng thlai te hi Eri pangang chaw a hman tur a ni.

‘Project Rotling – Hmasawna Rahbi Thar’ hi Mizoram chhunga RD Block 28 te inelna a ni a, he project hnuaiah hian Short Term Project, Medium Term Project leh Long Term Project a ni a, RD Block 28 atangin concept paper 84 a lut a, hengte hi District tinah a bialtu Project Director ten an endik hnuah State-Level Expert Panel in project 27 an thlang chhuak a, heta tang hian RD Minister kaihhruai State-Level Monitoring Committee in project 15 ah an lo thlifim leh a ni.

He project hnuaiah hian Short Term Project turin Khawbung RD Block hnuaiah ‘Project Sustainable Livelihood through Ericulture at Chhingzawl Ram’ leh Medium Term Project turin ‘Preparation of Productive Vegetable Farm at Buhtang Zawl and Khiangpui Zawl, Bungzung’ te thlan chhuah an ni.



MNF PR

Mizoram Sawrkara Samagra Shiksha hnuaia thawk mek, zirtirtu leh thawktu dang mi 3487-in Thlathum dawn hlawh la thei lova an awm chu pechhuak ngei turin sorkar an phut tih MNF Party chuan an sawi.

Nimin khan thuchhuah siamin Samagra Shiksha hnuai zirtirtu hlawh tur hi Central atangin thleng vek tawh a, hrenbeh sak an ni an ti a, sum hi Nov ni 8

khan a thleng chauh a, a thlen tlai tawh teh lul nen, ziaka ni 15 bak Mizoram Sawrkar chu kawl tang lo tura tih a nih laiin, ni 15 a ral hnu vawiin thlengin pek chhuah ala nilo a, hei hian sum enkawl kawngah leh zirna ngaihpawimawh kawnga ZPM kaihhruai sawrkar hlawhchham zia chiang takin a tarlang a ni, an ti.

Hetiang taka zirna ngaihthah leh thawktute hlamchhiah Sawrkar mipuiin an hrawn chu a pawl takzet a ni an ti a, an tha leh thiamna chhawr duh reng chung a hlawh hren sak rengtu, Mizoram Sawrkar hnuaiia sum enkawltu Finance Minister chuan a hna a tlin thlawtlo a, anmahnu enkawltu School Education Minister pawh in a enkawl Department thawktute pawimawhna a hre tawh lo a ni an ti.



AIR ON SOCIAL MEDIA

Chanchin thar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



PARLIAMENT

Sawrkar leh Opposition Party te chuan Parliament session kal mumal thei lo tihtawp an remti a. Tluang taka Lok Sabha leh Rajya Sabha-ah rorel an tum thu an sawi.

Lok Sabha Speaker Om Birla chuan Parliament House-a floor leader-ten inhmukhawm a ko a. Pu Birla chuan memberte chu house ah tluang taka rorel anih theih nan thawhpuih a sawm a. Party hruaitute pawhin Speaker rawtna chu an thlawp thu an sawi a ni.

He inhmukhawmah hian Congress hruaitu Gaurav Gogoi, TMC atangin Kalyan Banerjee, TDP hruaitu Lavu Sri Krishna Devarayalu, DMK hruaitu T R Baalu, NCP atangin Supriya Sule, SP hruaitu Dharmendra Yadav, JD (U) hruaitu Dileshwar Kamait, RDJ ah Abahy Kushwaha, Shi Sena (UBT) atangin Arvind Sawant te an tel a ni.

Parliament Affairs Minsiter Kiren Rijju chuan chanchinbumite zawhna chhangin inhmukhawma tel party hruaitute chuan Parliament-a rorel inkhawm tluang taka kal tir chu an thlawp vek a ti a. Tun thla ni 13 leh ni 14 hian Lok Sabha-ah Constitution kum 75 na tlin pualin a bika sawihona hun buatsaih a ni ang a ti a. Rajya Sabha-ah tun thla ni 16 leh 17 ah he hun hi hman a ni leh ang a ti bawh.



EAM

External Affairs Minister Dr. S. Jaishankar chuan khawvelin kil tin atangin harsatna a tawh avangin thawhhona tha neih a pawimawh a ti. CII Partnership Summit, New Delhi-a neihah he thu hi sawiin Pu Jaishankar-a chuan Ukraine indonate, US-China ineptate leh buaina dang thil man sang, leiba leh khawvel chhim lam Global South-a pawisa hlutna chungchanga harsatna te sawiin thawhhona tha zawk neih a pawimawh a ti a India leh

United States ten thawhdunna an tilian zel chuan remchanna tha zawk a siam zel a ni a ti bawk.

<><><>

BJP OBSERVER

BJP chuan senior party leader Nirmala Sitharaman leh Vijay Rupani te chu Maharastra-a legislature party meeting ah central observer atan a ruat. He meeting ah hian BJP MLA te chuan an hruaitu an thlang dawn a. Maharastra inthlan neih zawh takah khan BJP kaihhruai Mahayuti chuan seat 288 ah 230 lain chiang takin chakna an chang a ni.

<><><>